



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim


tiryimyim@aolima

tir yimyim

TAPAK 8

Zelenskyy-i tembar linüktem
Russia den raradaksüner

Manchester City Keeper Ederson
Copa America masayatsü



VOL. XXI ISSUE NO. 219 (ADOK 219) DIMAPUR RASEMNÜ (WEDNESDAY) MONUPII (MAY) 22, 2024 ₹ 5.00

Healthcare tsütsü DCMs aser BACs wadang tulu lir NGOs aser lokti balalai sen saruba state sorkari nokdangner

Dimapur, Monupii/May 21 (TYO): Ayushman Bharat-Health & Wellness Center nung Comprehensive Primary Health Care (CPHC) kübok Expanded Packages of Services indang asemnü Trainers of District Community Mobilisers (DCMs) and Block ASHA Coordinators (BACs) training ka May 21, 2024 nü Conference Hal, DUDA Guest House, Kohima nung tenzükogo. Iba sentong nung tajungshi o jembidang, DCMs, BACs aser ASHAs ya iba sentong nung mezümpur amai lir aser nürtem aser health care tsüngta tongti shilem agir, anungji iba training nung shilem agirtem ya akumtsüboa züngshitsüla, ta Mission Director, National Health Mission, Nagaland, Dr. Akuo Sorhie-i ashi.

Universal health coverage nung rangloker temelenshi tulu arua, ajak nem health care agütsütsü asoshi, meta talang nung alirtem nem health package terenem agütsütsü atema ASHAs temi tongti shilem agir, shirnok Health & Wellness Center nung primary health team züngsem lir aser CPHC kübok mapa teinyaktsü tuluba lir, ta lai ashi.

Anungji parnok link worker mesüra social mobiliser dang aliba nungi CPHC kübok shilem tuluba kumogo aser DCMs aser BACs ya parnok indang Coordinators alinung

kasa mapa lir.

Iba training yagi mapa tali bendenlokba tajungtiba nung inyaktsütsü tashi itshia pei sasep nung health care services tajungtiba agütsütsü imlar, ta Dr. Akuo-i ashi.

Lai parnok dang iba flagship program nung tali temulung agütsüshitsü aser asen state nung Public Health Care Delivery System melenshitsütsü ayongzük.

State Program Officer, National Health Mission, Dr. Mereninla Senlem-i CPHC kübok Extended Health Packages indang rateta jembidang, National Health Policy of Universal Health Coverage nükjidong ya nürtem kishizüng tonga health care services agütsütsü lir aser iba atema ASHAs ajanga tongtipang shilem agir aser DCMs aser BACs teinyaktsü ya parnok ajungmesoa yaritepsüba lir, ta ashi.

Tashidak yimya menatepba nungi memenatapa dangi melenba ngua aser disease burden nung reprangdangra tasüba shilem 80 aser disease burden ya tangbo memenatapa tashidak tem ajanga lir, ta lai ashi.

Lai iba training nung adenertem dang anogo asem nung akok tashi angazüktsü aser arendaka alibatem angatetjemtsü ayongzükua liasü.

Dimapur, Monupii/May 21 (TYO): State highways/national highways mesüra shishilempaba tesemtem nung Unions/Associations/NGOs mesüra damga jurila aser lokti balalai temelaba makai saru-saji balala saruba, talisa züngsem saru, subscription, contribution, donation, charge, levy/toll, mesüra yimya balala nung senotsü saruba nokdangtsü aser azüoktsü atema state sorkari mapang shia totuyuba balala agüja arur, ta sorkar sangdong ka ajanga ashi.

Iba dak sendakba nung Home Department ajanga May 31, 2012 nü unions, NGOs aser lokti tentet balalai ozüng alema senotsü saruba nokdangtsü sangdonga lir aser May 19, 2022 nüa sangdong ka nung association/telok mesüra kija jurila-i interstate check gates nung temelaba makai senotsü saruba, intra state check gates lapokba nokdanga sangdonga

PM-JAY aser CMHIS inyaktsü nung timtem aliba bentetogo

Dimapur, Monupii/May 21 (TYO): Pradhan Mantri Jan Arogya Yojna (PM-JAY) aser Chief Minister Health Insurance Scheme (CMHIS) ya National Health Authority (NHA) ajanga agütsüba IT Platform amshia inyaker.

Iba dak sendakba nung empanelled hospitals aser ano PM-JAY aser CMHIS beneficiaries ajanga dang Claims

liasi, ta sangdong ajanga ashi. Nisung kar danga iba ama ozüng alema mapa inyakba putetra IPC indang Section 188 aser 384 kübok tapet ozüng agi merenshitsü, ta ashi.

District administration aser police ketdangsurtemi item totuyuba mapa kuma inyaktsü metetdaksür, ta sorkar sangdong ajanga ashi.

Home Commissioner ajanga Director General of Police (DGP) aser Commissioner Nagaland dang NGOs aser lokti tentet balalai temelaba makai senotsü saruba nokdangtsü totuyuba agütsüba bhusema nokdaker, ta Nagaland Voluntary Consumers' Organisation (NVCO) sangdong ka ajanga ashi.

Iba shiti nung DGP aser Commissioner ajanga district administration aser police ketdangsurtem dang temelaba makai senotsü saru-sajiba nokdangtsü aser azüoktsü atema

state sorkari totuyuba agütsüba shidak amshitsü shia lir.

Anungji Dimapur Municipal Council Employees Welfare Union (DMCEWU) ajanga May 16, 2024 nü osang kaket tem nung state sorkar dang DMC jurisdiction küboki aitba commercial vehicles tem dang urban utility fee/entry fee meshitsü DMC dang melang ta zülua aliba ngua süngmanger, ta NVCO-i sangdong nung ashi.

Ano mameni state sorkar dang contractor temi inyakba mapa nung kongshitsüsa ozüng alema commission/percentage, Party fund amala terenlok mapa inyakba nungi nürtem sen ozüng alema lokzükua ayuba nokdangtsü asoshi iba ama totuyuba agütsütsü ayongzük, ta ashi.

Association/unions/church organizations/clubs temi senotsü lenmang bushia lottery/moudi/packed fruits, cooked meat/buffet ticket ayokba anentsüla, ta NVCO ajangasa ashi.

processing atema NHA ajanga tawa IT portal tasen kati belenogo aser state-ia scheme tasen atema Insurer ama Insurance Company tasen ka dangi onboard süogo, ta Thavaseelan K, IAS, CEO, Nagaland Health Protection Society ajanga sangdong ka nung metetdaksü.

Migration aser Insurer tasen onboard asüba ajanga processing

claims aser mozüki tem nung claims payment atema IT tsütsü tetsükdaksü kar liasü. Iba timtem bentetogo aser claims payment processing tanaben tenzükshio, ta sangdong ajanga ashi.

Anungji empanelled süa aliba mozüki ajungai PM-JAY aser CMHIS kübok meneni service agütsütsü ayongzük, kechiaser claims payments tem process süogo, ta sangdong ajanga ashi.

Alempang aser Penli ward nung Watsü Mungdang aser ULB candidate ajurutepa shisalemsatepba sentong aka



Adv. Maongtola Longchar (Alempang) Walunila (Penli Ward) Moala Pongen (Penli Ward)

Mokokchung, May/ Monupii 21(TYO): Mokokchung nung Urban Local Bodies(ULB) sentakba nung Mokokchung Municipal Council(MMC) kübok aliba Ward 18 nungi Ward 6(Alempang ward, Süngkomen ward, Penli ward, Marepkong ward, Kumlong ward aser Artang ward ta nung tetsürtem nem alakteta parnok tetsür kija nem shilem agia tokteptsü asoshi Women Reservation inyaktsü ajanga lemzüktsüba ama tanu Alempang ward aser Penli ward nung Watsü Mungdang-i ayongzükua ward ana nungi Watsü telen aser candidate-tem ajurua shisa lemsatepba sentong agiogo.

Tetsürtem asoshi 33% Women Reservation kisüng ta teperi masüta tetsür shia angatetsü kanga dang nungtak, tetsürtem nem maongka agütsüra yamai junga inyakteterta alima dang sayutsü aser tetsür jenjang ajungkettsü asoshi tang ULB election nungya maongka agia inyaktsü asoshi Alempang nungi temeyonger ka ama asütsü telemtetba agir ULB election nung noktakarta Alempang ward nungi candidate Advocate.Maongtola Longchar-i Alempang Ward Community Hall nung Watsü Mungdang-i ayongzükua agiba sentong nung jembidang ashi.

Küm aika dang tetsür jenjang wazüka ayutsü asoshi Watsü Mungdang-i kanga dang timtem jenti arema inyaka aruogo, tanu tetsürtem nem iba maongka asangsang nung ngutetdang Watsü Mungdang nem tenungsang agütsürta candidate Advocate.Maongtola Longchar-i

isa lemsatep. Kasa sentong nung Alempang Baptist Arogo Asso.Pastor (W) ajanga sarasademer tenzükba den Alempang Watsü Telen Tir Senatula-i tarur pelaa agizükba den metetpela mapang agi aser Watsü Mungdang nung Taoba Tir Wt.L.Opangla ajanga Municipal aruba tajangzük aser temoatsütem lemsatep aser taoba mapang Tongti Zülur Dr.Anungla Aier ajanga taoba mapang Watsü Mungdang-i Municipal nung tetsür tongtipang temedentem asoshi inyakba adenshia aliba watsütem den lemsatep aser tatem nung külemi sarasadema iba sentong tembang aser iba sentong Watsü Mungdang Tir Wt Arenla Lkr ketdangsuba nung agia liasü.

Ano maneni kasa anogosa

Penli ward community hall nung kasa sentong agiba mapang Penli ward nung candidate 2 Walunila aser Moala Pongen tenatia Watsü Mungdang lenirtem aser Penli Watsü telenpurtem den tena ULB election nung noktakba nükjidong lemsatepa liasü.

Walunila ajanga tetsürtemi ketdangsuba menden balala nung shilem agibaji asadanga 24.3%, India nung 15% aser Nagaland nungbo tetsür anati(2) dang shilem agidagi, tangaji toktsür Naga lima nung Nagatsürtemi lenla aika nung shilemtajung aser tulu agitetaka politics nungbo tetsür anati dang shilem agir, tetsürtem jenjang a j u n g k e t t s ü (w o m e n empowerment) indang jembia aruogo, anungji teng ULB election agiba ajanga asenok tetsürtem dak alima ajungkettsü aser nürtem anitsü sempet aliba sayutsü mapang tajungta angateta ni Penli Ward nung ULB election nung shilem agia tokteperta ashi..

Walunila-isa lanu zünger mapa mongoi alirtem asoshi mapa agütsütsütabo menanzük, saka lenmang balala bushitepa item lanurtem yaritsü aser Penli ward nung terenlok mapa inyaktsü asoshi penli Ward yimden den shisa agitepa inyaktsü nükjidong lirta

lemsatep. Maneni candidate tanabuba Moala Pongen-ia la ULB election nung noktakba nükjidong lemsatepdang, Mokokchung town ward ajak nung tongtipang teinyaktsü aika dang lir, saka küm 40 tashi Penli Ward Mokokchung nun glia arudang Penli Ward nung nürtem nungtakba teinyaktsü aika dang aliba reprangtetogo, anungji itemji inyaka nürtem tejakleni anitsü aser Penli Ward nung temelenshi kadaktsütsü asoshi inyaktsü mangdang iba ULB election nung shilem agia tokteperta telok tesenteper den lemsatep.

Penli ward nung iba sentong agidang tarur pelaa agizükba aser metepela mapang Penli Ward watsü telen Tir Rangbenkila ajanga agi aser iba den taoba watsü mungdang tongti zülur Bendangla ajanga küm aika tetsür temeden asoshi timte, nükten aser nungsen agia inyaka arur tanu jenjang tongtetba lemsatepba aser taoba mapang Tongti Zülur Dr.Anungla Aier ajanga taoba mapang Watsü Mungdang-i Municipal nung tetsür tongtipang temedentem asoshi inyakba adenshia aliba watsütem den lemsatep aser tatem nung külemi sarasadema iba sentong tembang aser iba sentong Watsü Mungdang Tatong Tir Wt. Asola ketdangsuba nung agia liasü.

Advisor Tongpang lenisüba nung Mkg DPDB senden menogo



May 21 nü Mokochung DPDB senden amenba mapang Advisor of Water Resources aser DPDB mendenbuba Tongpang Ozukum-i o jembiba noksa nung angur.

Dimapur, Monupii/May 21 (TYO): Mokochung District Planning & Development Board (DPDB) senden May 21 nü Advisor of Water Resources & Chairman Mokochung DPDB, Tongpang Ozukum lenisüba nung District Planning Conference hall, Mokochung nung menogo.

Senden nung Assistant Deputy Commissioner-i, June 5 nü World Environment Day amungba mapang süngtong atemba sentong ka den tzi bendentsü aser tziübo mesemshiba sentong ka agitsü benoka liasü. Paisa, sorkar ketdangsür ajak dang iba sentong nung yakyaka shilem agitsü, aser iba dak sendakba nung tenügdakba jenjangtem agitsü atema department tem nem tetuyuba agütsüo.

Senden nung Tuli Sub-division kübok Wameken Yimsen züngoksemtüsü, lokti

tentet ana züngoksemtüsü, Tuli Sub-division nung Sub-treasury office ka amenoktsü aser Green Hills Public School nungja Green Hills Academy agi melentsü atema onük benoka liasü. Item onüktem ajak ya ken o dak sendaka aliba department dangi abentsü tetuyuba agüja nung liasü.

Power line corridor tem nung arem merektetsü atema nübu agi ajema aliba indang tebilemtüsü Power Department-i benok aser iba dak sendakba nung ADC-i Village Councils-i teyari agütsütsü imlaba lemsatop. Paisa, Sub-divisions ajak nungi ketdangsürtem dangi parnok tazüokba kübok aliba Village Council tem den senden ayongzüka mena longjemer inyaksü tetuyuba agüja liasü.

Senden nungsa Department of Animal Husbandry & Veterinary Services-i department inyakyim indang

metetdakja liasü. Sorkar tetuyuba dak ajemdaker Quarantine Check Posts shibangba dak sendakba nung house-i, ken o dak sendakba nung department nungi official shiti agizükba sülen jenjang agitsü telemtetba agia liasü.

Maneni Department of Public Health Engineering-i tang tinyakdak aliba department indang project tem indang metetdaksü. House PHED dang block ajak nung plastic waste management indang data bendentsü, aser plastic janatem intokba asadanga alitsü tetuyuba agütsü.

Senden tatem Advisor, Tongpang Ozukum-i, senden nung shilem tajung agiba atema züngsemajak dang kanga pelaba lemsatop aser department ajak dang pei mapa nendaka inyaksü ajungshia liasü.

2buba 'Quality Summer Funcamp' ayonger

Dimapur, Monupii/May 21 (TYO): Nagaland Board of School Education-i, züngoksema aliba Institutions tekolak ajak dang, Ministry of Education, Department of School Education and Literacy tawabangba kübok National Board for Quality Promotion (NBQP), Quality Council of India (QCI)-i online sabang ajanga 2buba 'Quality Summer Funcamp' ayongzüka metetdaksüo.

Iba camp indang omenji

"Safety Stars: Shining bright with Quality" asütsü. Iba camp ya April 15 nü tenzükogo aser June 30, 2024 nü tembangtsü.

Iba Quality Summer Funcamp nung KG nungi class 12 tashi nung aliba kaketshir tejangrartem ajaki shilem agitetsü. Iba camp ajanga kaketshirtem nem Drawing competition, Essay/ Article writing, Online Quality Quiz, Short Video-Making tetoktepba amala nung parnok sangrasangji, arok aroka

bilemdangba tashi, tebilemtüsü bentetsü atema tasatem aliba sayutsü asoshi maongka agütsür.

Camp dak sendakba nung osang tejangjaba agitsü atema iba link: <http://sfc.qci.org.in/camp/2024> semdangtetsü.

Anungji iba dak sendakba nung Institutions tekolak ajak dang kaketshirtem nem osang agütsütsü aser Funcamp nung shilem agitsü atema kaketshirtem ajungmesotsü mepeshia metetdaksüo.

Nagaland, Miss Universe India audition nung shilem agitsü

Kohima, Monupii/May 21 (TYO): Beauty and Aesthetic Society of Nagaland (BASN)-i Mongolbarnü ashiba agi, state tang mezüngbuba Miss Universe India nung shiem agitsü.

Symphony Café nung osangbenertem den sensaksemba mapang BASN tir Melekhoto Pucho-i ashiba agi, state nung lisopurtem shirnoki iba audition nung shilem agitsü jangrar, parnok atema July 2 nü Niathu Resort Chumukedima nung audition agitsü.

Audition den repsema Miss Universe Nagaland India official amenokba sentong agitsü. Tejangrartemi (arishi küm 18 temapur) audition atema Bodhbarnü nungi tenzüka BASN indang official instagram page ajanga tenüng züngoksemtetsü.

Pucho-isa, iba ya Nagaland nungi tetsürtem atema maongka tajung ka lir, kechiyong tang mezüngbuba Miss Universe India atema franchise state nem agütsüo aser audition agitsü nungdaka kümogo, kechiyong Miss Nagaland 2024 December ita-ang agitsü saka Miss Universe India pageant bo August ita agitsü, ta ashi

Glamanand Entertainment Pvt. Ltd.-i Miss Universe India atema temeden ngua state shia nungi sempet aketertem bushitsü asoshi inyakyim atsülangshitsü sentong aliba sangdongba sülen Nagaland nema iba franchise ya agüja liasü.

BASN media and information secretary, Sarah Konyak-i ashiba agi, Miss Universe India-i, India kübok state ajak nungi State Director

tem shimogo, aser parnoki achaayanga pei state nung Miss Universe India tawabangba kübok pageants ayongzüka agitsü. Nagaland atema BASN tir Pucho, state director asütsü shimogo, ta lai ashi.

Glamanand ya National aser International beauty pageants ayongzüka agiba lokti tentet parent company ka lir, koba mendenbuba Nikhil Anand lenisüba nung inyaksangshir. Glamanand Group ya alima nung beauty pageant organizations tulutiba rongnung ka lir aser linük 70 tashi nung prokshia oa lir. Parnoki ayongzüka National Beauty Pageants tem rongnung Glamanand Supermodel India, Miss Teen Diva, Miss Teen India, Mrs India, Mr India Universe densema lir, ta laisa shisem.

Kasa mapang nung BASN finance secretary Veineinem Singson Haolai-i, audition atema shorts & black vest, body hugging black cocktail dress, pencil heels/stilettos (3 inches and above), light make-up, no glasses/lens, padded lingerie jewelry nungdaksü ta ashi.

Laisa, upper age bar kecha mali ajisüaka tetokteperitem arishi küm 18 tema asütsüla, ta ashi.

Maneni BASN-i, audition atema registration taa sen 1000 agitsü aser spot registration kasa anogo 9:30 ako nungi 10:30 ako tashi agitsü. Online registration atema tejangrartemi item number; 7641007449/7005284814 nung tongteprateptetsü, ta metetdaksü. Osangbenertem den sensaksemba mapang BASN züngsem Alem Ozukum-a densema liasü.

Impur nung Dorka Cell Training agi



Impur, Monupii/May 21 (TYO): ABAM WM nung Vocational Training cum Production Centre (VTPC) ajanga ABAM zone 4 Dorka cell asoshi sü arba aser chiyungtsü tapu balala yangluba training ka ayonga May 20 & 21, 2024, Impur nung kanga takom ngua agiogo.

Iba training nung Mrs. Kilangla, Impur ajanga sü arba tapu balala sayua liasü aser Mrs. Tutu Jamir, MTBA ajanga chiyungtsü tapu balala yangluba sayua liasü.

Iba training ya tanü asenoki pei sasa inyaka nokdaktetba

kibong aser taküm asütsü nüka nung agir. Asenoki inyaktetsü mapa aika meinyaki rongsen jenti entoka alia achir aser subur. Anungji joko asenok sasa inyaktetba mapatem asenoki inyaka tangar dak nendaka meli litetsü nükjidong nung iba training agiogo. Ajak agi arogo pungo nungi parnok 12 arua iba training nung aten.

Maneni iba sentong agia aodang Tsüngremer leniba agia aika tajangzük anguba sentong asütsü sarasadema atar, ta Executive Secretary, ABAM Rev. Dr. Mar Pongener-i sangdong ka ajanga metetdaksü.

NAGALAND POLLUTION CONTROL BOARD
 Signal Point, Dimapur - 797112, Nagaland
 Tel.: 03862-245727, TeleFax: 03862-245726
 Website: www.npcb.nagaland.gov.in e-mail: npqb2@yahoo.com

AMBIENT AIR QUALITY FOR KOHIMA AND DIMAPUR CITY
KOHIMA ASER DIMAPUR NUNG MOPUNG MERÜK-MEMERÜKBA JENJANG

Sl. no	City	Location of air station	Type of area	Monitoring dates			Permissible limit As per the National Ambient Air Quality Standards "Iba tasazük alemabo metudaksütsüla"
				14.05.2024	16.05.2024	18.05.2024	
1	Dimapur	Bank Colony	Residential	75	82	61	100 µg/m ³
2		Dhobinala	Commercial	160	191	152	
3		NPCB Office, Signal Colony	Residential	68	85	54	
4		Tenyiphe, Chumoukedima	Commercial	84	110	73	
5		Nagarjan	Residential	100	121	82	
6		Viola colony	Residential	83	90	40	
7		Burma camp	Commercial	185	182	90	
8	Kohima	Opposite NST Office	Residential	50	60	44	
9		PWD Junction	Commercial	64	85	62	
10		High School Junction	Commercial	142	179	97	
11		Midland (Upper)	Residential	65	60	49	
12		Forest Colony	Residential	61	67	52	

Iba osang ya nübertem ajangzüksü atema Nagaland Pollution Control Board-i agütsür.

LS election: Odisha nung yimdak lir 1000 dak temi vote magütsü

New Delhi, Monupii/May 21 (Agencies): School aser mozüki amenoktsütsü akhangba mataloktsüba atema Odisha kübok Balangir constituency nung yimdak lir 1000 dak temi Hombarnü Lok Sabha Election nung vote magütsü.

Vote agütsürtem maruba ajanga polling ketdangsürtemi polling booth tem nung EVMs aser VVPATs ajak 2 ako nungbo shibangja liasü.

Iba tatalokba ya Odisha nung Balangir Lok Sabha Constituency kübok Titlagarh Assembly Constituency nung Karam Tala Gram Panchayat kübok Dabjor yimtsüng nung ataloka liasü. Ajak senteper voter 1071-i vote magütsü, kong tebur 561 aser tetsür 510 densema lir.

"Anepdang 5:45 nung mock pool agiba mapang voter aser poll agent tem maru. Ghonda aika ataba sülena poll agent aser voter tem maru. Iba yongji EVMs aser VVPATs ajak 2 ako nung shibangtsü. Parnoki school aser mozükitem amenoktsütsü akhangba mataloktsüba atema iba jenjang agi," ta Presiding Officer-i ashi.

Kasa mapang nung yimdak lir Debashish Patra-i ashiba agi, "ita teku tejakdang onoki district administration nem tashishiba agütsüogo, saka shinga maru. Onok indang Panchayat ya kilometer 18 pilar tanga yimtsüng ka nung lir. Sorkari 'Beti Bachao Beti Padhao' scheme ajungkettsü meranger, ajisüaka jalatem shirnok

anogoshi km 18 cycle nung mener school-i aoer parnok atema mebilemer. Tinetet rogo tema pension agizütsü atema km 18 jajar. Onok ration agizütsü atema aotsüsa akümer aser ration dang nungi senzüsenpongba mapang sen timba intoker. Onoki sorkar dang onok tebilemtsü tama bentettsütsü akhanger, aser iba sülenang onoki vote agütsütsü."

General elections shilem 5buba nung Odisha nung Aska, Kandhamal, Bolangir, Bargarh, aser Sundergarh Lok Sabha menden atema candidate 40 aser assembly constituency 35 atema candidate 265 toktepa liasü.

Lok Sabha Election nung Odishia nung voter shilem 72.8 shi-i shilem agia liasü.

Mamata anema jembiba atema EC-i Abhijit nem tenokdangba agütsü



New Delhi, Monupii/May 21 (Agencies): Chief minister Mamata Banerjee luja mejembitsü o jembiba atema Election Commission of India (ECI)-i, retired Calcutta high court judge aser West Bengal kübok Tamluk constituency indang Bharatiya Janata Party (BJP) Lok Sabha candidate Abhijit Gangopadhyay nem ghonda 24 nüboyimba sentong nung shilem magütsü atema tenokdangba agütsüogo.

"Abhijit Gangopadhyay amala tazüng tashi aser professional kati iba amala o jembiba ya Commission-i magizüker. Abhijit Gangopadhyay-i jembiba o ajanga West Bengal state tenüng menüksüogo, kong tetsürtem nem akümtsübu agütsüba sobaliba tajung benshia aruogo," ta EC-i ashi.

May 15 nü Haldia nung lokti senden ka nung ojembiba mapang Haldia-i Bengali oshi nung, "Mamata Banerjee na sen kwiyoung ayok? Nü jenjang lakh 10? Kechiyong nü indang make up Keya Seth-i sütsür? Mamata Banerjee ya tetsür asü

India Trinamool Congress-i EC nem May 16 nü tashishiba ka agütsü aser May 17 nü EC-i the Model Code of Conduct nung aibelenba atema Gangopadhyay nem show cause notice ka agütsü, koba pai May 20 nü langzüogo.

Gangopadhyay nem show cause notice agütsüba copy ka koba BJP tir JP Nadda nem agüja liasü, iba nung EC-i April 1 nü tetsürtem nemja mejembitsü atema party tem nem tetuyuba agütsür aliba shisema lir.

"Ajisüaka tesasatsüka Abhijit Gangopadhyay-i, kanga mejungi aibelen menaogo. Commission-i tetuyuba tejangja agütsür liaka election atema nüboyimba mapang pei jembishinü maziükteti jembiba ya tamakok tulu anguba ama züngshir," ta West Bengal chief electoral officer ajanga agütsüba notice nung shia lir.

"Commission-i ken o kanga junga asadangogo aser Abhijit Gangopadhyay-i jembiba o ya nisung ka dak rangloker jembiba ya jangjaogo, anungi iba ajanga Model Code of Conduct nung aibelener," ta EC-i May 21 nü ashi.

Gangopadhyay-i March 5 nü obendanger mapa toktsü aser bilemdanger," ta March 7 nü BJP nung dena liasü. Pa May 25 nü Lok Sabha election nung tokteptsü.

BJP-i MP Jayant Sinha nem 'Show-Cause Notice' agütsü

New Delhi, May 21, 2024 (Agencies): Taoba Union Minister aser MP Jayant Sinha-i Hombarnü vote meinoktsüba sülen BJP-i pa dangi show-cause notice ka yokogo.

Jharkhand nung Hazaribagh Lok Sabha menden nungi BJP candidate asütsü atema Manish Jaiswal shimba sülen Sinha-i "organisational work and election campaigning" nung shilem magi ta show-cause notice nung shia lir.

Taküm March ita Sinha-i Lok Sabha election nung shilem magütsü shia liasü aser pa tang Hazaribagh nungi MP lir.

"Hazaribagh Lok Sabha menden nungi Manish Jaiswal tokteptsü sangdongba sülen nungi nai organisational work & election campaigning nung shilem magi. Nai nü indang vote

magütsü. Nü inyaksangshi ajanga party tenüng menüksüogo" ta BJP state general secretary Aditya Sahu-i ashi.

BJP-isa Sinha dang anogo ananü tsüngda kuli tejangja agütsütsü mapang züngzüksüogo. Ajisüaka arishi küm 61 tain Sinha-i tang tashi kecha melangzü lir.

March 2, 2024 nü Sinha-i BJP president JP Nadda dang election maparen nungi anisüngzüük agütsütsü shia liasü.

Pai India aser alima tesem balala nung global climate change atema mapa inyakba nung temulung agütsünür ta Sinha-i idangji shia liasü.

Iba sülen ghonda ishika dang lir BJP-i Hazaribagh Lok Sabha menden atema Jaiswal shimba osang metetdakja liasü.

Iba menden nung Yashwant

Sinha-i MP inyaka arur par jabaso Jayant Sinha-i melenzüka liasü.

BJP MP Gautam Gambhir-ia kasa mesükba osang ka lemsatepba liasü. Pai cricket maparen nung temulung agütsütsü atema political duties nungi anisüngzüük agüjäng ta ashi.

BJP-i East Delhi constituency nung tanga teinyakdak MP Gambhir melena Harsh Malhotra toktepdaktsür.

BJP election maparen inyakerteri Lok Sabha menden shia atema survey agi aser olemtepa liasü aser parnoki Gautam Gambhir o Jayant Sinha na meshimtsü lemtet.

2019 küm Hazaribagh Lok Sabha menden nung Sinha-i Congress candidate Gopal Sahu madak votes 4.79 lakh agi takok ngua liasü.

पंजाब नेशनल बैंक Punjab National Bank

Circle Sastra: Imphal
Kwakeithel Thokchom Leikal, Imphal
E mail: cs946700@pnb.co.in

SALE NOTICE FOR SALE OF IMMOVABLE PROPERTIES

E-Auction Sale Notice for Sale of Immovable Assets under the Securitization and Reconstruction of Financial Assets and Enforcement of Security Interest Act, 2002 read with provision to Rule 8 (6) of the Security Interest (Enforcement) Rules, 2002. Notice is hereby given to the public in general and in particular to the Borrower (s) and Guarantor (s) that the below described immovable property mortgaged/charged to the Secured Creditor, the constructive/physical/ symbolic possession of which has been taken by the Authorized Officer of the Bank/ Secured Creditor, will be sold on "As is where is", "As is what is", and "Whatever there is" on the date as mentioned in the table herein below, for recovery of its dues due to the Bank/ Secured Creditor from the respective borrower (s) and guarantor (s). The reserve price and the earnest money deposit will be as mentioned in the table below against the respective properties.

Sl. No.	Name of the Branch	Description of the Immovable Properties Mortgaged/ Owner's Name(mortgagors of property/ ies)	A) Dt. Of Demand Notice u/s 13(2) of SARFAESI ACT 2002 B)Outstanding Amount as per respective demand notice C)Possession Date u/s 13(4) of SARFESI ACT 2002 D)Nature of Possession Symbolic/Physical	A)Reserve Price (Rs. in Lakhs) B)EMD (last date of deposit of EMD) C)Bid Increase Amount	Date/ Time of E-Auction	Details of the encumbrances known to the secured creditors
1	Dimapur Branch (045120) Home Mart 0451250021340 Prop:Mr.Arnold Keitzar, House No-15, K-Khel,Diphupar A, PS Diphupar,Dimapur Nagaland-797112 Limayamger Aier(Guarantor and Mortgagor) S/O Imkongmar Aier, House No.-53, Sochang House, Old LRC,Khermahal, Dimapur,Nagaland-797112	All the part and parcel of the Land and Building in the name of Shri Lima Yanger Aier measuring 0B-01K-15L covered by Dag No.-556,194/1834 under PP No.392,Mouza No.1,Block No.3 situated at Dimapur Town,Nagaland,bounded by North: CAW Store by SOUTH:Main Road,On the EAST:Uramia fabrication Unit/Life Space and On the West:DE Oriental DREAM(Hotel).	A) 11.08.2014 B) Rs.34,24,913.34/- + further interest C) 21.11.2014 D) Symbolic	A) Rs.260.60 Lakhs B) Rs. 26.06 Lakhs C) Rs. 0.20 Lakhs	07.06.2024 From 01:00 PM to 04:00 PM	NIL

TERMS & CONDITIONS

The sale shall be subject to the Terms & Conditions prescribed in the Security Interest (Enforcement) Rules 2002 and to the following further conditions:
1. The properties are being sold on 'AS IS WHERE IS BASIS' and 'AS IS WHAT IS BASIS' and 'WHATEVER THERE IS BASIS'
2. The particulars of Secured Assets specified in the Schedule hereinabove have been stated to the best of the information of the Authorized Officer, but the Authorized Officer shall not be answerable for any error, misstatement or omission in this proclamation.
3. The Sale will be done by the undersigned through e-auction platform provided at the Website <https://www.mstcecommerce.com> on from 01:00 AM to 04:00 PM.
4. For detailed term and conditions of the sale, please refer www.ibapi.in, www.tenders.gov.in, www.mstcecommerce.com <https://eprocure.gov.in/epublish/app>

Place: Imphal
Date: 22.05.2024

Authorized Officer
Punjab National Bank
Secured Creditor

STATUTORY SALE NOTICE UNDER RULE 8(6) OF THE SARFAESI ACT, 2002

FORM NO. 14
[See Regulation 33(2)]

**OFFICE OF THE RECOVERY OFFICER- III
DEBTS RECOVERY TRIBUNAL, GUWAHATI**
Suwarna Bhawan, House No. 12, New Town Path,
Near Hanuman Mandir, G.S. Road, Ulubari, Guwahati- 781007 (Assam)

DEMAND NOTICE
Notice Under Sections 25 to 28 of the Recovery of Debts & Bankruptcy Act, 1993 and Rule 2 of Second Schedule to the Income Tax Act, 1961.
RC / 235 / 2023
CANARA BANK
-Versus-
MESSERS SAMSUNG ELECTRONICS

To,
(CD 1) MESSERS SAMSUNG ELECTRONICS
Proprietorship firm of Sri Suken Mazumder, Sati Shopping Market, G.S. Road, Dimapur- 797112.
(CD 2) SRI SUKEN MAZUMDER
S/o L.P.Mazumder, Near City Tower, Circular Road Dimapur, Nagaland-797112.
(CD 3) SRI BARUN CHOUDHURY
Also at Westyard Colony, Near Dolls Hotel, Dimapur, Nagaland- 797112.
Presiding Officer, DEBTS RECOVERY TRIBUNAL, GUWAHATI ajanga **OA/277/2022** nü totuyuba agütsüba dak sendakba Recovery Certificate nung ajemdaker sen **51,22,944.85 (Rupees Fifty One Lakhs Twenty Two Thousands Nine Hundred Forty Four and Paise Eighty Five Only)** den pendentelite aser future interest @ 14 % Compound Interest Monthly w.e.f. **01-06-2022** nungi tenzüka sen memonok tashi aser sen **54,255-(Rupees Fifty Four Thousands Two Hundred Fifty Five Only)** na atema temonoktsü kumogo (Jointly and Severally/ Fully/ Limited).

(1) Amount due as per the Recovery Certificate: Rs. 51,22,944.85
(2) Interest from 01.06.2022 to 16.10.2023 @ Rs.14%Rs. 9,86,412.50
(3) Costs Rs. 54,255.00
TOTAL Rs.61,63,612.35

2. Iba sangdong adoker anogo 15 tsüngta iba sen menoktsü metetdaksür, aji mesüra Recovery of Debts Due to Banks and Financial Institutions Act, 1993 aser yangji aliba Rules agi mela aliba ama recovery asütsü.
3. Taruba hearing anogo mesüra matongdang affidavit nung nü rongsen tejangja sangdongtsü metetdaksür.
4. Na iba sangdong agütsür matsüngdang ken o jembitsü asoshi **14-06-2024** nü anepdang 10:30 ako nung arutsü metetdaksür.
5. Yangi shia aliba sen den külemi nai item ya menoktsü:
(a) Iba certificate / execution proceedings atema sangdongba sülen tenzüka mapang sen tetemlok.
(b) Iba sangdong aser warrants aser danga processes aser temonoktsü sen bushiba mapang indokba indang sen ajak nai menoktsü.
Given under my hand and the seal of the Tribunal, on this date : 07-02-2024
**RECOVERY OFFICER
DEBTS RECOVERY TRIBUNAL GUWAHATI**



TIR YIMYIM YIMOBILEM (EDITORIAL)

DIMAPUR RASEMNÜ, MAY (MONUPII) 22, 2024

Asen mepua shiba shimtsü ?

Nagaland nung Municipal aser Town Council akümtsü atema Nagaland Municipal Act latetba sülen kena Nagaland ajak nung liromedema election magitet aruba sülen, taruba ita nung mezüing Urban Local Bodies (ULB) election agitsü sentong sangdonga lir. Atangji, Nagaland nung ibai mezüing ULB election-bo masü kechiyong Mokochung district dak alaka tanga district-tem nungbo khenbo agiogo. Ano tesasatsükaji, tanga Nagaland ajak nungbo ULB election ya magitettsüsa kümogo, kechiyong 'Eastern Nagaland' nungbo iba election ya magitsü parnok nübortemi lateta lir. Ajisüaka, tanga tanüingba district-tem nungbo tang yanglushia akaba Municipal temzüing ozüing kübok ULB election ya agitsü apusor asünungji, Municipal aser Town Council agitsü alidak yimitem nung alir nebortem asoshi pei mepu (ward) nung shiba aser kechi komaka nisungang shim nung tajungba asütsü ta bilemdanga nebo bushitsübaji kanga tongtibang kümogo. Tang yabo Nagaland nung ULB election magitetba ajanga Municipal aser Town council shia nung state government nungi ketdangser kaka 'Administrator' asütsü asoshi shimer yoker, anungji pai mesüra lai pei alidak nübortem nungdakbatem jungabo memetettsüa akok, kechiyong pa mesüra laji yangji telidak nisung masütsüa akok. Aji oda, government nungi officer ka Municipal aser Town Council nung mapang tatsüka atema Administrator asütsü shimer yokba nisungji raliwalir amato ka dang khen arua monger aoer. Ano, Kohima aser Dimapur dak alaka tanga nungbo teinyakdak ADC mesüra SDO(Civil) ka nem Municipal aser Town Council mapa repa bendaktsür. Item jagi shishilembadak oset aser chiyongtsü jenjang ataktsü, jana aoktsü aser shishilembaba mapatem inyaktsü temelaba (permit) agüja repringtsüba dak alaka Municipal mesüra town council telongzük nung terenlok mapatem tulukabo inyaka aoba mangur. Atangji, ibaji ULB election magiba ajanga center nungi sen meyokba agi terenlok mapa inyaknyonga meinyaktetter asütsüa akok, anungji kodang election agia ULB kümtetdir idangjiang yimitem topur junga renloka aotsü teimla tulu lir. Ajisüaka, pei lima aser pei yimti renloktsübaji sen tama masü saka pei lima aser pei yimti meimba shisatsü tama arutsüla. Aji oda, center nungi sen aika yokaka ULB nung ketdangsertemi pei yimti memeimra Municipal aser Town Council tesemtemji tang dang nungi tamajungba tesempatsüka akümtsü. Iba tangatetba nung mepu (ward) shia nung alir sensosangertemi asen mepu nunga shiba shimla (?) ta bilemdanga shimtsübaji kanga tongtibang asütsü. Atangji, mepu ka madak asüyonga yimten tashi amshia inyaktsübaji tongtibang asünungji aikati rakteptsü saka aika rongnungji shibaibo pei mepu nungdak temetetba aser shibaibo pei mepu temeimba (?) ta medemdanga shimtsübaji tongtibang asütsü. Karbo kodanga pei mepu nübodok nunga shilem magidang aser pei mepu ajungtsü bilema long kata meyipa kecha meinyakdang ser ajungbena ULB election nung tokteptsü jangraba purtema alitsüa akok. Aji oda, pei mepu junga mengudang aser pei mepusangertema junga memetet ser yimten tashi aginüba kija agi ULB nung ketdangser kümnüba neboa alitsüa akok. Ashiko, item jagibo sen amshitsü aser temesüzük o tajung aika jembia arutsüa akok. Ajisüaka asen mepu tilaka nung asenok nungdak inyakdaktsütsü atema kodaser asen vote yoka nisung ka shimtsü ta bilema nebortemi ULB election nung ya kanga shisa kaa shilem agitsübaji tongtibang asütsü. Ano, junger majung kaji, ULB election yaa yimten mapasa asünungji political party tenüing nung tokteptsü asoshi temulunger aser tejangrartem asoshibo lenmang lapoktsütsü, idangji sen aser tashiyim amshia tokok entsütep nungbo ULB election ji yimti yanglutsü atema masü yimti raksatsü asoshi aruba amai asütsü. Atangji, tapu tanakna atalokyongbo nebortem dak tangatetba lira, sen agia malizükttetsü aser tashiyim agia makoktsü. Iba ama tangatetba jagi pei mepu nungi tenzüker pei yimti aser pei state tajungba küma yanglushi tenzüksübaji ULB election ya asütsü.

OLEMSABANG

Tanela sempet amshiyim nung tangatetsü olen kar

~ L. Kika Pongener.

Tanela sempet ya kechisa ? Kechi nukjidong nung agütsü ? Tanela sempet Tsüngrem nungi asü masü ta kodaser metettsü ? Tanela sempet ya tetsübo tanela asü ? Tanela sempet koda amshitsü ? Tanela sempet akar taküm koda alitsü ? Tanela sempet maka ser jilo benshira kechi asütsü ? Tanela sempet ya tajangzük angulen amshitsü asü ? Ni laishir ka masü, saka kanga tongtipang amai kü mulong rongba bilemba agi, item indang telangzüba olen kar, nisunger'er shisatsü o nungi masü, saka Tsüngrem o nungi kü tamang yari lemsatepnur.

Tanela sempet ya kechisa ?

1 Korint-12:4-11. Tanela sempet tapu aika lir, saka Tanelaji ka dang, aser tenzüka mapa tapu aika lir, saka Kibuba ka dang. Teinyakba mapa tapu-tapu lir, saka Tsüngrem shibai ajak nung lia ajakji inyaker, paji ka dang lir. Nisung shia nem külem ajungtsü asoshi Tanelai jungkai adokba agütsü. Kechiyong nisung kar nem Tanela ajanga shisatsü o agütsür, aser tangar kar nem kasa Tanela ajanga temetetba o agütsür. Tangar kar nem Tanela kasa ajanga tamang, aser tangar kar nem Tanela kasa ajanga tanebtsü sempet, aser tangar kar nem sayatenya mapa inyakba, aser tangar kar nem sayutsüingiba, aser tangar kar nem tanelatem shitetba, aser tangar kar nem o tapu-tapu jembiba, aser tangar kar nem oshitem ratettsü agütsür. Saka item ajakji Tanela kasa- i nisung shia nem lemsa-a apuoktsür.

Tanela sempet agütsüba nukjidong :

Efesa-4:11. Kibubai pa sempet, oda kar tenyar asütsü, kar ainkar, kar sayutsüingir, kar Pastor, aser kar tesayur asütsü agütsü. 1 Korint-12:7. Nisung shia nem külem ajungtsü asoshi Tanelai jungkai adoka agütsür. Efesa-4:12. Aser tenzüka mapa asoshi, Temeshipurtem renemteta subotsü asoshi, aser Khrista temangji yangluloktsü asoshi agütsü. (Tanela sempet agütsüba nukjidongji Khrista temang/arogo yangluloktsü asoshi agütsü ta angateter).

Tanela sempet Tsüngrem nungi asü masü'ar kodaser metettsü ?

1 Yohan-4:15. Temeimbatem, nenoki tanela shia dak tamang, saka tanelatem Tsüngrem nungi asü masü parnok tendangang; kechiaser tiyazü ainkar jenti alima nung adokogo. Nenoki Tsüngrem tanela ya agi meteter, Yisu Khrista shi nung aru ta aji tanela kobaisa nangzüker, ibala Tanela ajak Tsüngrem nungi lir. Saka tanela kobaisa Yisu menangzüker, ibala tanela Tsüngrem nungi masü, saka aji Khrista anemer tanela, koba arudagi ta nenoki angashiogo. Aser iba tanelaji tang alima nung sunga lir. Yakob-1:16-17. Kü meimba adianutem, nenok tekülakokdaktsüma. Sempet tajung ajak aser tabensaba ajak temaba nungi lir. Yakob-3:17-18. Aser temaba nungi aluba shisatsüji tamasa temeruk, ajisur tesunep, ajemalu, temulongjang tanük, yimlibilem aser tejang tajung agi sunga lir, tatidaktsü maka aser anemsa maten. (Tsüngrem nungi aruba Tanela jagi Yisuji Khrista ta agizüker, tatidaktsü/tashishitsü kecha mali, temeruk, tesungjem, ajemalu, yimlibilem, anemsa, nanoknara aser tiaksang maten. Tsüngrem nungi anguba Tanela sempet jagi sungjem-sungjema tazüokba nung tashishitsü meli-i inyaker).

Tanela Sempet ya tetsübotsü tanela asü ?

2 Timoti-1:7. Kechiyong Tsüngremi asenok nem tetsübo tanela masü, saka ain aser temeim aser tazüokba tanela agütsü. (Tsübudakja masü saka temeim agi inyaktsüla ta angateter. Sungjem-sungjema tazüokba (Discipline) nung, tangar meinprongdakja aser timtemdakja masü....Kechiyong aseni amangba Tsüngrem ya tetsübotsü tanela aketba Tsüngrem ka masü ta laishiba nungjagi angateter).

Tanela sempet koda amshitsü ?

1 Korint-14:39. Anungji adianutem sayutsüingitsü kanga jangra-ang, aser oshi balaka jembibaji tesongtem. Saka mapa ajak meraketa aser tatongi shia inyakdakjang. Tita-2:8. Asen tsütsü madeneri asenok anema o tamajung ashitsü maka nung aaktsüsa, ne tesayuba nung temeruk, teshisadangba, aser mezüingmeshi masütsü o atangji sayuang (Tashishitsü meket-i, meraketa, tatongi, mapang tamshi shia, tebang-temeli azüoka, tangar nem timtem magütsüi, aser tangar tetsüing memetsütsüsa kanga kümdanga amshitsüla ta laishiba nungjagi angateter).

(Maneni asüing adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Nigeria nung Khristantem amakba manener; IDPs yarir



Abuja nung aliba New Kuchingoro camp nung Blanco, Texas mayor Mike Arnold-i IDP Ms. Hanatu Ango den ajurutepa sensaksemba angur. Africa Arise charity ajanga yariba school ka nung Ango ya head teacher lir.

Abuja, May 21, 2024 (Agencies): Nigeria nung küm 10 tejaklen nungi Khristantemi timtem jenti ajurua arur. Nigeria nung Islamic telungpurtem aser prangpong amertemi Khristantem reshikangshia arur ta Open Doors UK-i ashir.

Nigeria nung nütsüung yongsük 230 million shi lir aser iba nung Khristan aser Muslim nunger kasasa lemsa lir. Ajisüaka Nigeria north aser central regions nung Khristantemi timtem kanga ajurur.

"Alima nung Khristantem tamangba yimsü atema teimtiba tepsetbaji Nigeria nung lir.

Islamic telungpurtemi tebur aser asangurtem dak tenük yoka mapa inyaker aser parnoki tetsürtem pur aoe aser tashiyim agi shi nung medemer" ta Open Doors UK-isa metetdaksüogo.

Khristantem teimba amakbaji Boko Haram aser Islamic Fulani ajanga lir. Boko Haram ya Islamist militant group ka lir aser parnok Muslim north nung teimba lir. Külen, Islamic Fulani telungpurtem ya linük tiyongtsüla Khristan aser Muslim nunger meyoktepa alidak teimba lir.

Texas mayor Mike Arnold-i mapang shia Nigeria

semdanger aser pai Khristantem yarir.

Nigeria nung Khristantem amakba ajanga internally displaced persons (IDP's) 2.2 million tema lir.

Arnold-i tawa tu Nigeria semdanga liasü aser idangji pai Africa Arise charity tentetogo. Iba ya internally displaced children pur education nung yaritsü atema tentet.

Abuja nung aliba New Kuchingoro camp nung Blanco, Texas mayor Mike Arnold-i IDP Ms. Hanatu Ango den ajurutepa sensaksemba angur. Africa Arise charity ajanga yariba school ka nung Ango ya head teacher lir.

Germany nung Khristantem anema kanga inyaksangshir

Berlin, May 21, 2024 (Agencies): Germany nung "anti-Christian" anema maparen kanga bulur ta sorkari metetdaksüogo.

Alternative for Germany (AfD) party lennir Petr Bystron-i asüngdangba ka langzüdang Germany sorkari iba ya metetdaksü.

Bystron-i Bundestag indang Foreign Affairs Committee dang asüngdangba ajanga linük

nung Khristantem anema tatalokba 125 tashi police tsüngdang benoka aliba metetdaksü.

2023 nunga iba mesükba ken o 277 tashi benoka liasü aser ken o 55 tashi kiojen raksatsüba indang liasü. Ajisüaka iba mapa kanga bulua inyakba atema tashitsü kecha mali ta Interior Ministry spokesman-i ashi.

Kiralongrar telok Hamas-i

Israel amakba ajanga Middle East nung mangatetep adoka lir aser iba nung ajemdaker Germany nung Khristantem anema mapa inyaker asütsü akok ta nisungtemi ashir.

Khristan reju aika dangi amokmerenba emails yokogo aser iba nung Khristan yimsü aser Khristan tamangertem anema zülua lir ta Interior Ministry spokesman-isa metetdaksü.

Hungary-i yariba ajanga Iraq nung Khristantem aika akümer



December 2022 nung Hungarian President Katalin Novák (tiyongtsüi) Iraq semdangdang agiba noksa angur. Islamic State-i Khristantem teimba ser aliba jila ka atsünga agiba aser raksatsüba sülen Hungary teyari ajanga iba jila yanglushitsüba atema lai Iraq semdanga liasü.

Baghdad, May 21, 2024 (Agencies): Hungary Helps programme ajanga Iraq nung Khristan yimsü züina odar aser northern Iraq nung tamangertem aika kümдар ta Azbej Tristan-i ashi. Azbej ya state secretary for aiding persecuted Christians lir aser pai Honibarnü Zakho

semdangba sülen iba osang metetdaksü.

State secretary Azbej-i Saint Mary Church aser Armenian Apostolic Church community centre meshitetba sentong nung aden.

Iba centre ya Hungary sorkari teyari agüja yangluba lir. Hungary Helps programme

ajanga building complex yangluba nung 750,000 euro grant agütsüogo ta Azbej-i ashi. Iba centre nung menden 300 aliba tenla ki ka, classrooms aser parish office ka lir.

Hungary-i 2016 nungi Iraq nem humanitarian aser development grants 21 tashi agütsüogo.

ANOGO ABEN TSÜNGREM DEN

I lungang... Tejakleni

"Meshiteta lumiang, temeshi tamburtem aser linük nung alir Tsüngrem kidang sentepdakjang, ayimtenang" (Yoel 1: 14)

Mosai tenem nung ammag lir (40) aser anogo lir (40) lumi aser ozüung ter agizük (Tazüung 9:9-11). Otsü nung lumia sarasadema alidang Tsüngrem jungkai adokba kuli angur. Lumiba jagi asenok tanela tangatetba chiradaktsür aser Tsüngrem ola shitak angatetdaksür.

Kibuba dang Dawidi lumia ajep. Pai ayimtena ashi, "O Tsüngrem, nai ni shisa makaba metet; aser kü temenen na nungi miima mali." Kodang ni ajepba aser lumiba agi kü nela merenshi, aji ni asoshi tartsuba liasü. (T. Ken 69:5-10). Lumiba jagi asenok Tsüngrem tsüngdang ajemalua temulung meyipba nung yarir.

Kodang Nehemiai Yirusalem jara laoba angashi, pai amen, aser anogo aika mang yima ajeb ta pai ashi (Neh. 1 :3-4). Tanü yangi Khristar arogo asoshi noksa ka angur. Jara raksa lir, süngküm aronger aser tsükchirtem aiter. Onok kümzükang, Kibuba ta lumia ayimtendi.

Lumiba jagi Tsüngrem sentong ilungdaksür ta masü saka Tsüngrem mapa nung asenok tejakleni odaksür.

Kü Tsüngrem, ni len aidang, kü ki nungi piladang kü mulung nung shidakjang, Ne mulung süang.

Karbi Anglong nung police-itenla ki nungpoka atur: UCF

Guwahati, May 21, 2024

(Agencies): Assam kübok Karbi Anglong district nung police-i tenla kitem telungi ayir aser osang bendener ta Khristan telok kati aitsüogo.

Ajisüaka, Assam Police-i ashiba agi taküm February ita amokmerenba sülen police-i Khristan rejutem kümzüka ayutsü atema mapa inyaker.

Diphu nung United Christian Forum-i District Commissioner dang police-i arogo aser züngsemtem osang bendener ta shidi ka zülugo.

Police-i Diphu jila nung alioba tenla kitem nungpoka atur aser noksatem agir. Parnoki jelia osang kecha mesangoktsüi tasüngdangbatem asüngdang aser iba ajanga public petsaprongdaksüba den tsübudaksür, ta UCF-isa ashi.

Police-i "official order" shitak magütsüi iba mapa inyakba ajanga nübertem temulung yirutsüogo anungji iba mapa anentsüla ta parnokisa ashi.

Assam Police headquarters nungi rejutem kümzüka ayutsü tetuyuba agütsüba nung ajemdaker police-i district nung Khristan rejutem bushitepa aoe ta Karbi Anglong nung Superintendent of Police-i ashi.

Assam Catholic Educational Trust-i taküm February ita Director General of Police dang Khristan rejutem aser tamangertem lendongi aitsü akok ta shisi ka züluba sülen Superintendents of Police ajak dangi tetuyuba yok ta SP-isa ashi.

Assam nung Hindu nunger tamanger telok kati Assam nung missionary schools ajak amokmerena liasü. Parnoki Khristan school tem nungi

tamangba yimsü dak sendakba noksatem aser chapels agientsü tetuyuba agütsü.

Iba atema Khristan telok balalai pei pei jenjang nung ketdangsürtem den ajurutep aser missionary schools nung principal temi police dang parnok kümzüka ayutsü shiditem zülua liasü.

December 2022 nunga Assam police-i telung nung Khristantem, tenla ki, rejutem aser tamangba yimsü melendaksüba onüktem asoshi survey ka agia liasü.

Khristan lennirtemi iba inyakyim anema ola adokdang Assam Chief Minister Himanta Biswa Sarma-i police maparen aija liasü.

June 2023 nung sorkar sangdong ka agütsüba nung iba survey agütsü atema tetuyuba ya aibelena agütsü aser jelia osang mesangoktsü tashi aser official order ka melii iba ama mapa meinyaktsü ta shia liasü.

"Tang tesüsaba survey agiba ajanga nübertem petsaprongteper aser tsübur" ta UCF President Reverend Solomon Rongpi-i ashi.

"Hindu telok kati February 7 nü missionary schools nungi Christian symbols ajak agientsü aser Catholic putirtem den tamangba tanishirtemi Indian sobutsütem agütsü tetuyuba agütsüba sülen Khristantem lendong ajurutsü akok ta asüba tebilemba adok" ta Assam Christian Forum spokesperson Allen Brooks-isa ashi.

"Aibelenertem pua merenshitsü melena police-i Khristantem data bendentsü atema tenla ki telungi ayir" ta Brooks-isa ashi.

**AO OSHI ANGAZÜKDAK:
TANÜ ANGAZÜKTSÜBA OJANG**



Süngto

(n) süng lanu (young tree)

* Arem nung süngto kata melensüki yutsütsüla.

Süngtok

(n) Süngmetak (wood chips)

* Süng asodang süngtok agi arua kü dak aon.

OLONG PAITEP # 6794

1						2				3
								4		
5		6				7				
8										9
								10		
				11		12				
		13								
14						15				
				16						

TIPILEN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüc asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6793 TELANGZÜBA

TIPILEN :

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer, 13. Sen,
- 15. Kioktsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsütsü, 6. Azübenshi, 8. Lah,
- 9. Jangkok, 12. Akok, 14. Nashi, 16. Sür.

NAI-A YA METETTER MA



Sikkim asoshi tejak tentetba mapang ka ama Cannes International Film Festival 2024 nung "Tara, the Lost Star" sayaa liasü. Ibai Sikkim nungi kanga nungtuwu sapang tongtetba film mezüngbuba alitsü. Sikkim aser film tenung nung actor aser producer Shyama Shree Sherpa-i iba benjongmung nung shilem agi. Iba film ya ita tenet agia Sikkim kübok Changu Lake anasa tebour tajung Gnathang-Memenchu nung tangoka liasü.

Gauhati high court nung Justice 2 permanent judges akümtsü



Guwahati, May 21, 2024

(Agencies): Chief Justice of India (CJI) DY Chandrachud-i anir Supreme Court Collegium ajanga Gauhati high court nung additional judges ana permanent judges ama shimtsü shidangogo.

Tena ya Justice Susmita Phukan Khaund aser Justice Mitali Thakuria na lir.

Supreme Court Collegium nung Justice Sanjiv Khanna aser Justice BR Gavai na dena lir aser parnoki October 26, 2017 bangzüng den liromedema iba ya shidanger.

Supreme Court Judge anati Justice Khaund o Justice Thakuria nati obendang agütsübatem meyipa reprangshi aser idangji kanga timi agütsüba ajitet.

"Smt. Justice Susmita Phukan Khaund aser Smt. Justice Mitali Thakuria nati

obendang balala agütsübaji kanga tajung ta onoki ajitetogo. Anungji Gauhati High Court nung Collegium ajanga shidangba ama onokia tena Permanent Judges ama shimtsü junger ta shidanger" ta committee-i ashi.

Justice Mitali Thakuria ya Guwahati nung aso aser Handique Girls College, Guwahati nung 1987 nung Science degree ka dener graduate asü. Lai 1992 küm Masters in Zoology aser LLB renem.

Lai Bar nung züngsemba sülen District Judges Court nung mapa inyaka liasü. March 1998 nung lai Judicial Service nung aden aser December 2012 nung Grade I nung ajungket. Lai District & Sessions Judge, Kamrup-Metro ama inyaka arur

August 16, 2022 nung Gauhati high court nung additional judge ka ama ajungket.

Justice Susmita Phukan Khaund ya Namrup, Assam nung soa inet. Lai Handique Girls College Guwahati nungi BA (Honors) in Economics azüng aser 1989 küm Gauhati University nung Master's in Economics züngtem.

1989 nung lai Gauhati University (Government Law College) nungi LL.B degree angu aser March 12, 1991 nü advocate ka ama züngsema liasü.

July 27, 1995 nung la Assam Judicial Service nung Grade-III officer ka ama inyaksü tenzüc aser November 29, 2006 nung Grade II nung ajungket. August 16, 2022 nü la Gauhati high court nung additional judge ka ama ajungketa liasü.

Assam sorkari Bihu Guinness World Record atema Rs 1.6 crore agütsü

Guwahati, May 21, 2024

(Agencies): April 13, 2023 nü alima nung Assam nunger Bihu tsüngsang kanga tetshia liasü aser Guinness World Records nung züngok.

Guwahati nung aliba Sarusajai Stadium nung dancers aser drummers 11,000 tema adenshir shilem agia iba alima otsü tasen yangluteta liasü. Ajisüaka Right to Information (RTI) application ka ajanga iba otsü ajangzüktetba nung senotsü aika agütsüba metetogo.

Assam sorkari otsü ana yanglutsü atema Guinness World Records ketdangsürtem nem Rs 1, 66, 82,722 agütsü.

Otsü ana ya "largest Bihu dance performance" aser "largest performance by traditional folk musicians using instruments like dhol, pepa, gogona, and toka" lir.

Assam sorkari Bihu dance record atema Rs 59 lakh aser musician record atema Rs 23.6 lakh agütsü.

Ano, iba otsü anaprong atema consultancy fees ta ser Rs 84.2 lakh agüja liasü. Ajisüaka, iba osang ya RTI reply mangu tashibo miimbanga dang liasü.

Satra Mukti Sangram Samitee president Devabrata Saikia-i RTI application agütsüba sülen Assam

Electronics Corporation Limited (AMTRON)-i iba osang yimjak nung metetdaksüogo.

Iba ajanga sobaliba benjung den senotsü timi mamshiba indang osang ka meteta kümogo.

Bihu atema Guinness World Record angubaji Assam asoshi konang ka lir saka senotsü aika endokba agi dang iba otsü tasen ya anguba kuli lir.

Guinness World Records ketdangsür nem Rs 1, 66, 82,722 agütsüba dak alia Assam sorkarisa iba sentong atema Rs 53 crore endoka liasü.

Assam sorkari dancers aser drummers shia nem Rs 25,000 agütsü.



Assam nung libajen wazüka ayutsü asoshi osang sangdonga cyclist nisung ti-i May 19 nü Kaziranga National Park nungi Orang National Park tashi kilometre 160 talang lenmang nung cycle bener jaja liasü. Iba mapang parnoki tesem balala nung anena nüburtem dang libajen wazüka ayutsü asoshi osang sangdong aser iba sentong May 21, 2024 nü tembang.

Israel-i Rafah nung tayimtsü amshia amakdang nisung 5 asü

Gaza City, Monupii/May 21 (Agencies):

Mongulbarnü Israel sepaitemi Gaza north tsütsü Jabalia camp telungi tank tem bener ai aser tayimtsü amshia bomb pokloktsü, ta yangji alirtemi ashi aser kasa mapang Israel nungeri tayimtsü amshia south tsütsü Rafah yimti amakdang nisung pongu tepset. Tan ita Gaza Strip tezülen north aser south tsütsü Israel-i tanen makai amakba ajanga nisung meyrirjang aika asendenshir pei ki yutsür agen tenzük, aser teyari aitba nokdanga ayawara tenzüktsü jenjang nung lir.

Küm 75 jakdang tesem balala nungi jena aortem asoshi refugee camp yanglua aliba Jabalia nung Israel army temi bulldozers amshia local market ka anasa dokan aser ki o jen raksatsü, ta yangji alirtemi ashi, koba hopta ana tejakdang mitkar temi tenzüka liasü.

Ita ishika tejakdang Hamas telok aliba tesemtem raksatsüogo ta ashiba camp-i Israel sepaitem meyipa shilanga Gaza amokbanga aliba telungpur telok yangji tanaben asendenshi mesüdaktsütsü meranger ta ashir.

Jabalia nung ki raksaba aser lenmang nung nisung tasü mang aika lir saka rescue team tem aji tonga moteter, ta health ketdangsür aser Gaza Civil Emergency Service ajanga ashir.

"Israel-i camp raksatsür, bomb pokloktsüba manener aser alimai Gaza telungi chiyongtsü tali yoktsü ajungshir. Onoki chiyongtsü tali masü

takum kumzükner," ta Jabalia nung alir anasa Gaza City bushia jena aosang Abu El-Nasser-i ashi.

Iba rara nung Palestine nunger 35,000 dak tema tepsetogo ta Gaza Health Ministry ajanga ashir, koba ita ti jungogo. Ano nisung 10,000 shi samar bushir aser parok ya ki o jen teraksa agi nembanga alitsü südi ta parnoki ashir.

October 7 nü Hamas teloki Israel south tsütsü arütsü alema aita nisung 1,200 tepseter nisung 250 dak tema pua bener aoba sülen Israel-i iba telok samatsütsü meranger.

Iba rara yagi tzükumlen nütsüng yongsük tali adenshia aliba tesem raksatsü, nisung aliba ki, school aser mozüki samatsü aser humanitarian crisis adok.

Israel Defence Forces ajanga par inyakyim indang osang sangdongba mapang, parnoki Gaza Strip nung 'terror targets' 70 shi raksatsü aser yangji military compounds, nok-nü rizünga ayuba tesem aser warehouses, missile launchers aser observation posts dena lir, ta ashi.

Israel indang tanks temi Jabalia nung aliba Al-Awda Hospital asemnü buba lungbanger lir aser anasa Beit Lahiya jila nung Kamal Adwan mozüki nung injang khaloktsü, ta ashir.

North tsütsü Jabalia nung yasüng ki ka tayimtsü amshia amakdang nisung asem tepset. South tsütsü Khan Younis nung aliba ki ka nung tayimtsü amshia

amakdang tanur asem tepset aser Rafah nunga ki ka nungi tila tanur asem densema nisung pongu tepset.

Khan Younis anüdoklen Israel sepaitem arua bulldozer agi ki o jen raksatsüba mechi nüburttem Khuzaa jila yutsür jena aor ta yangji alirtemi ashir.

"Tesem ajaklen bomb pokloktsür, nüburttem tetsübo nung ajener. Ibai ajungbena arua amakba lir," ta Khuzaa nung alir kati phone ajanga osangbener dang shir jena ao.

Israel-i Gaza south tsütsü Rafah yimti amaker, kong nisung million 2.3 dak tema aliba nungi tesadang ka north tsütsü jena ogo.

Gaza nung United Nations indang agency tulutiba, UNRWA ajanga Hombarnü ashiba agi, ita tetenzüklen nungi arütsülen aliba yimti nung Israel-i tenük yoker makyonga arudang nisung 800,000 dak tema jenogo. Civilian tem aika takum samatsü mechi linük balalai Israel dang iba yimti mamaktsü ajungshia aru.

Ajisüaka Israel-i Rafah nung anünga aliba Hamas indang battalions pezü ya samatsütsü mechi maneni amaktsü nangzüka lir.

IDF sepaitem dak mortar shells khaloktsüba kiralongrar indang tesem ka jangjateta lir, ta Israel mitkari taoba mapang shia liasü.

Iba sülen parnoki tayimtsü amshia tsükchir dak amak aser yangji rockets aser mitkar indang hadir balala ngutet, ta ashir.

Iran nungeri Tir Ebrahim Raisi mang ayimer

Tehran, Monupii/May 21 (Agencies):

Deobar nikongdang Tir Ebrahim Raisi den pa indang foreign minister aser dangar nisung tenet dena Azerbaijan arütsü anasa helicopter tsükokba nung asüba atema Mongulbarnü Iran nunger meyrirjang aika mang ayimtsü Tabriz yimti nung adenshia liasü.

State TV ajanga mangyimertem indang noksa sayua liasü, kong nisung aika süoshi tanak agir teku nung tsüngshia liasü aser truck ka naro temesüng agi meybanger tasü mang süngden linük nisan agi aleper meilongi nüburttem ajanga anir ao.

"Telok, kin mesüra oshi oben balala süaka nisung ajak tir aser pa den alir dang tatem salem ashitsü arua lir," ta Tabriz nungi ozüng yanglur Masoud Pezeshkian-i ashi.

Tabriz nung nisung jenti adenshi ta state TV-i shiaka yangji alir kari ashiba agi, linük indang küm 45 puti otsü nung taoba mapang lenir asü dang

adenshiba ama masü.

Iran-i Raisi asoshi anogo pongu mang ayimtsü sangdongaka 2020 küm Iraq nung US indang missile ka agi Revolutionary Guards tanishir Qasem Soleimani tepsetba sülen mangyimer adenshiba amabo masü ta ashir.

Raisi indang tasü mang ya helicopter tsükokdak nungi anasatiba yimti, Tabriz-i bener ao aser iba yimti nungi Tehran airport-i bener aotsü aser iba sülen temeshi Shi'ite Muslim nunger Qom yimti-i bener aotsü.

Iba nungi linük yimtiba bushia tanaben bener oa Grand Mosalla Mosque nung khen ayutsü aser Brehostibarnü aremstü atema Iran anüdoklen par ki aliba Mashahd jilai bener aotsü.

Mangyimer temi Raisi, Foreign Minister Hossein Amirabdollahian, Tabriz yimti nung Hokulbarnü sarasadem lenir aser danga ketdangsürtem indang noksa aliba poster tem bener liasü.

Iran nung loktiliba aser yimtenren azüokba nungi tenzüka rongsenketzüng tsütsü timtem ajurua putir lenirtem aser nüburttem tsüngta mepetmesü tali adoka aliba mapang ka nung linük tir ya asür.

2022 küm Iranian-Kurdish tsür ka ketdangsür kabu nung lia asüba ajanga linük tesem ajungalen mepetmesü adoka sorkari tashiyim amshia aika apu aser kar nem temerenshi tulu agütsüba Iran nunger mulungjang nung tang tashi lir.

Ano nüburttem alitsü asoshi tasakba akumba den ochimashi mapa tali inyakba ajanga June 28 nü tir election agitsü aliba nung aikati shilem magitsü akok.

US-i tenokdangba agütsüba den junga ketdang masüba aser ochimashi mapa inyakba ajanga rongsenketzüng tsütsü timtem ajurua aliba tebilemstü ya Iran nung tang yimsü tesüdak putir temi bentettsü makoktsü, ta nisung million aikati tamang makateter.

Menungra Bilemteter



Anungla. T. Imsong (Longjang)
22nd May 2021

Küm asem süiogo, saka nai toktsür aoba temeimbatem tanü tashi molung züreper. Nü temeim aser terajem mapa tajung onoki bilemtet dang ozü molung süneper.

Temeim Kinungbo, Jala Jaden aser Kinungertem



Office of the
AO RIJU
MOKOKCHUNG : NAGALAND - 798601
"Kenozülu Yinsem"

SANGDONG

Ao Riju-i achaayanga agiba Arangtet Tatidang (AT) 2024 küm atema Tanabubaren, Aami 25-27 anogotem nung agitsü ta AOR ZONIZÜNG, 2024 nung agüja lir. Saka tang aruyaa aliba ULB Election, Aami 26, 2024 anogo nung agitsü Election Commission ajanga sangdong agütsü nung, Arangtet Tatidang Tanabubaren 2024-ji Chiteni 2-4, 2024 anogotem nung agitsü metetdaksür.

Tatidang zülutsü tesem aser mapang tejangja Ao Riju Mendenti ajanga jelia metetdaksütsü.

Sd/-
Rev. Prof. Rongsen Lkr
Chairman

Sd/-
S. Wati Ozükum
Secretary

Zelenskyy-i tembar linüktem Russia den raradaktsüner



Kyiv, Monupii/May 21 (Agencies):

Ukraine Tir Volodymyr Zelenskyy-i ashiba agi, pai tembar linüktem dang rara nung dena Russian missiles tem khazüka yokba nung yaritepdaktsüner aser arütsü anasa mitkar indang hadir yua alidak anüolen linüktemi agütsüba nok-nü amshitsü meladaktsüner.

"Ibai pei temulungtetba indang lir, saka nisung ajaki oshiooben shia ojang kasa amai ashir: ajaki tensa tamajung akumtsü tsübor," ta arishi küm 46 tain Zelenskyy-i Hombarnü Kyiv nungi osangbener dang ashir.

"Ukraine nungertem tasür ta jembiba ajaki angapar - ibaji nüburttem asoshi rara tesashiba akumba masü," ta pai ashi.

Ukraine kumzüka ayuba nung yaritsü atema kidanger NATO linük tem indang armed forces temi Ukraine litsü alema Russian missiles aitba raksatsütettsü, ta Zelenskyy-i ashi.

2022 küm nungi tenzüka makyonga arudang Russia-i missiles aser drones meyrirjang aika Ukraine dak khaloktsüogo aser May 10 nü nungi tenzüka arütsülen Kharkiv region amak tenzüka küm ka ser tesadang tsüngta litsü tulutiba rakzüka liasü.

"Russia nungeri Ukraine litsü nung tayimtsü 300 amshir. Anüng nung itemji nokdangtsü atema onoki tayimtsü 120-130 shi nüngdaker," ta Zelenskyy-i ashi aser ano maneni Western allies dang air defence systems tali agütsütsü ayongzüka liasü. Ukraine ya US-i yangluba F-16 fighter jets tem ataa lir.

Linük temi tayimtsü kera magütsütetra, parnoki kidanger NATO linüktem nungi senzütettsü aser Russian missiles tem khazüka yoktettsü, ta pai ashi.

Ukraine-i ano international partners tem den parnok indang nok-nü amshia arütsü anasa aser Russia litsü telung nung Russian military hardware amaktsü atema jembir, ta Zelenskyy-i ashi.

"Tang tashi telangzüba tajung mali," ta pai ashi.

Mongulbarnü German Foreign Minister Annalena Baerbock Kyiv tonga aru aser linük balala dang Ukraine indang air defences asoshi tali yaritsü ayongzüka liasü.

France Tir Emmanuel Macron-i par sepaitem Ukraine linüki meyoxtsü ta meshitettsü ta ashiba sülen NATO linük aikati sepai meyoxtsü ashiba nung Germany ya linük ka lir.

Euro 2024 sülen Kroos football asaya nungi anentsü



Monupii/May 21, 2024 (Agencies): Real Madrid aser Germany team nungi midfielder Toni Kroos, Euro 2024 sülen professional football asaya nungi anentsü.

Arishi kum 34 tain asayar ya 2014 kum July ita Bayern Munich nungi arua Real nung aden aser kanga takok ngua asayaogo. Real nungi asayaba mapang pai La Liga aser Champions League naprongla pezubenben kokogo.

Mannei Kroos ya 2014 kum World Cup akokba Germany team nunga densema liasü.

Pa 2021 kum July ita international football asaya nung anen saka Germany coach Julian Nagelsmann den sensak asemba sülen takum February ita telemtetba melenshia liasü.

"Ni kanga junga asaya aliba mapang asaya nungi anenüa liasü," ta Kross-i Instagram nung post ka ajanga ashi.

"Ni asaya nung anentsü atema mapa shitak ngutetba aser ni mulungba mapang nung anentetba atema pelar," ta pai ashi.

Kroos arishi kum 17 asüba mapang 2017 kum September

ita mezüngbuba Bayern Munich nungi Bundesliga nung asaya liasü, aser kasa season nung parnoki German league titles aben. Pa Bayern nungi asayaba mapang Bundesliga asemben kokogo.

Maneni pa 2013 kum Bayern-i Champions League akokba squad nunga pa densema liasü, saka pabo masaya.

Kroos-i ashiba agi, Real nung adenba anogo football asayar ka ama aser nisung ka ama pa takum melenshi, aser tang pa tebilemba ajak agi team atema European Cup 15buba koktsütsü atema lir.

Real pur June 1 nü Wembley nung Borussia Dortmund den Champions League final asayatsü lir.

"Ni Real Madrid nungi dang asayatsü aser iba club nungi tatembangbuba asayatsü ta shia aruogo," ta pai ashi.

"Kum 10 sülen season tembangba den külemi ni asaya nungi anentsü. Ni iba takok mapang ya kodanga mamatsü," ta pai ashi.

Kasa mapang nung Real Madrid tir Florentino Perez-i, "Real Madrid indang puti otsü nung Toni Kroos ya asayar tajungtiba rongnung ka lir aser iba club ya teti par ki asütsü," ta ashi.

Euro 2024 nung Germany team June 14 nü mezüngbuba Scotland den Munich indang Allianz Arena nung asayatsü.

Manchester City Keeper Ederson Copa America masayatsü



Monupii/May 21, 2024 (Agencies): Manchester City Ederson yiruba ajanga Brazil coach Dorival Júnior-i Copa America squad nung pa melena Sao Paulo keeper Rafael shimogo.

Manchester City keeper Ederson eye socket tachichilen yiruba ajanga pa par team tatembangbuba asaya nung masayatet. Iba asaya nung parnoki West Ham United goal 3-1 agi koka Premier League title benogo.

City-i Brehostibarnü sangdong ka ajanga ashiba agi, Mongolbarnü Tottenham goal 2-0 agi akokba asaya nung Cristian Romero den tsüktepba sülen pa yiru aser scan süa liasü.

Iba tatalokba sülen Brazil nung international asayar ya melen aser pa melener Stefan Ortega-i Dejan Kulusevski aser Son Heung-min nati metsüba ball kanga junga kumzüka liasü.

"Ederson yiruba ajanga pa 2023-24 season nung tanungba asayatem nung shilem

magitetsü," ta city-i ashi.

Pa May 25 nü Manchester United den FA Cup final nunga shilem magitetsü.

Júnior shibai national team coach mapa January ita agizüka liasü pai Liverpool goalkeeper Alisson aser Athletico Paranaense keeper Bento na team nung shimmer liasü.

Juventus defender Bremer, Atalanta midfielder Éderson aser Porto forward Pepe nungera team nung Deobarnü züngoksemogo.

South America nung football asaya achaayangba lokti tentet CONMEBOL-i Brehostibarnü team nung taoba mapang ama asayar 23 masü saka 26 shimtsü asoshi temelaba agütsüogo.

Copa America ya United States nung June 20 nü nungi tenzüka asayatsü. Brazil team mezüngbuba asaya June 24 nü Costa Rica den asayatsü.

Iba asayamung masaya tsüngda Brazil team United States aser Mexico na den friendly asayatsü.

Asayamung atema team nung asayatem tenüng benoktsü atema tatembangbuba anogoji June 21 nü asütsü.

Archery WC: Qualifying round nung India team 2buba nung lir

Monupii/May 21, 2024 (Agencies): Archery World Cup Stage 2 nung Asian Games tesüsabuba koker alila Jyothi Surekha Vennam pezübuba nung tembangba sülen compound tetsür team qualifying rankings nung tanabuba jenjang nung lir. Iba asayamung ya Yecheon (South Korea) nung Mongolbarnü tenzüko.

Taoba ita World Cup Shanghai leg nung gold medal anguba sülen Jyothi-i point asem agi dang tasembuba jenjang metongteti la South Korea tsür Oh Yoo Hyun sülen pezübuba nung tembang. Lai point 707 ngua liasü.

Iba asaya nung Han Seungyeon-i point 711 ngua la temaba aser Luxembourg tsür Mariya Shkolna (710) tanabuba jenjang nung liasü.

Kasa asaya nung India tsür Parneet Kaur (704) aser world champion Aditi Swami (702) na ti aser 15buba nung liasü. India team South Korea sülen tanabuba jenjang nung tembangogo.

India tetsürtem quarters-i bye nung iogo aser parnok

seventh seeded team Italy den asayatsü.

Ajisüaka India tebur compound archers temibojunga masayatet aser parnok rongnung tajungtibaji Priyansh liasü, shiba 16buba nungang liasü.

Teburtem rongnung Prathamesh Fug easer Abhishek Verma na 20 aser 24buba nungang liasü.

Iba ajanga team ranking nung konshia parnok pezübuba-i asepzüka alu. Priyansh aser Jyothi na senteper mixed team ranking nung pezübuba tongtetogo.

Recurve archers tem atema qualifiers Bodhbarnü tenzütsü.

Takum Apir ita Shanghai leg World Cup final nung mezüngbuba South Korea team akokba sülen India tebur recurve team tang iba asayamung nung shilem agitsü lir.

Stage 1 World Cup nung India team-i gold medal pongu, silver ana aser bronze medal ka ngua temaba jenjang nung tembang aser parnok sülen South Korea team (gold ana, silver asem aser bronze ana) liasü.

Malaysia Masters: Treesa-Gayathri na tanabuba round-i iogo



Monupii/May 21, 2024 (Agencies): Malaysia Masters Super 500 nung Mongolbarnü tetsür tarep asaya nung India tsür Treesa Jolly aser Gayatri Gopichand nati Chinese Taipei tsür Huang Yu-Hsun aser Liang Ting Yu na koka tanabuba round-i iogo.

Commonwealth Games bronze medallists Treesa aser Gayatri na iba asayamung nung seventh seeded tarep lir, aser mezüngbuba round nung tenati Huang aser Liang na 21-14 21-10 agi koka liasü.

Tebur kija asaya nung India nung assayer pezü qualification round saya saka parnok rongnung kati danga main draw metongtet.

Sathish Kumar Karunakaran shibai taoba kum December ita Odisha nung mezüngbuba BWF Super 100 title bena liasü, pai Malaysia nung asayar Cheam June Wei 21-15 21-19 agi akok saka tanabuba asaya nung

Indonesia nung asayar Shesar Hiren Rhustavito 21-13 20-22 13-21 agi mekoki liasü.

Kasa mapang nung World Junior Championships nung bronze medalist Ayush Shetty-i mezüngbuba asaya nung külem India nung asayar Kartikey Gulshan Kumar 21-7 21-14 agi akok saka tanabuba asaya nung Thailand nung asayar Panitchaphon Teeraratsakul 21-23 21-16 17-21 agi makok.

Tebur kija asaya qualifier nungsa S Sankar Subramanian-i mezüngbuba round nung 12-21 17-21 agi Rhustavito mekoki liasü.

Tetsür kija asaya qualifiers nung Tanya Hemanth-i 21-23 8-21 agi Chinese Taipei tsür Lin Sih Yun makok.

Maneni tetsür tarep asaya nung Palak Arora aser Unnati Hooda nati Chinese Taipei tsür Hsu Yin-Hui aser Lin Jih Yun na 10-21 5-21 agi mekoki tsükogo.

BILEMDANGANG

"Azümesenertemi maongka kecha mangur."